



Obaveza požurivanja s pokajanjem i upozorenje onima koji to odgađaju (Medina)

Hatib: dr. Ali ibn Abdurrahamn el-Huzejfi

9. redžeb 1443. po Hidžri / 11. februar 2022.

Hvala Allahu, Silnom, Onome Koji mnogo prašta, “On noću zavija dan i danom zavija noć” (Ez-Zumer, 5). Sve je kod Njega do roka određenog. Hvalim svoga Gospodara i zahvaljujem Mu na blagodatima i dobroti. Svjedočim da nema boga osim Allaha, jedinog, Koji druga nema, Jednog, Silnog, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob, poslanik i odabranik. Allahu moj, smiluj se, spasi i blagoslovi Svoga roba i poslanika Muhammeda, sallallahu alejhi ve sellem, i njegovu plemenitu porodicu i ashabe. Bojte se Allaha i budite Mu pokorni, jer je pokornost Njemu najispravniji i najbolji put, i opskrbite se za ahireta, a najbolja opskrba je bogobožnost.

O vjernici, razmišljajte o trajanju ovog kratkog dunjalučkog života, njegovim bezvrijednim ukrasima, često prevrtljivosti njegovih stanja, shvatit ćete njegovu pravu vrijednost i naučit ćete njegovu tajnu. Ko se pouzda u njega, on je obmanjen, ko se u njegovo okrilje skloni, potpuno je nezaštićen. Kratkoća dunjaluka mjeri se kratkoćom vlastitog životnog vijeka. Životni vijek jedinke počinje satima, nastavlja se danima, nakon dana dolazi mjesec, pa godina, pa godine, i dođe do svoga kraja. Niko ne zna kakve ga krupne i velike stvari čekaju nakon smrti. Da li se životi onih koji dolaze poslije tebe smatraju tvojim životom? Životni vijek jednog stvorenja samo je trenutak u odnosu na životni vijek svih generacija. Štaviše, dunjaluk je “metā – užitak”, a užitak je ono u čemu uživaš u određenom trenutku, a zatim se završi u istom vremenu.

Uzvišeni kaže: “O narode moj, život na ovome svijetu samo je prolazno uživanje, a onaj svijet je, zaista, Kuća vječna.” (Gafir, 39)





“Navedi im kao primjer da je život na ovome svijetu kao bilje, koje i poslije natapanja vodom, koju Mi s neba spuštamo, ipak postane suho, i vjetrovi ga raznesu. A Allah sve može!” (El-Kehf, 45)

“Šta ti misliš, ako im Mi dopuštamo da godinama uživaju, i naposljetku ih snađe ono čime im se prijeti, zar će imati šta od slatkog života koji su provodili?” (Eš-Šuara, 205 – 207)

Naš Gospodar obavještava nas o tome da će ljudi u svojim kaburovima ostati vrlo kratko do trenutka proživljenja i polaganja računa i da će ovaj naizgled dugi period proći kao jedan tren. Uzvišeni kaže: “A na Dan kada ih On sakupi učinit će im se da su boravili samo jedan čas u danu, i jedni druge će prepoznati.” (Junus, 45)

“Ti izdrži kao što su izdržali odlučni poslanici i ne traži da im kazna što prije dođe! A onoga Dana kada dožive ono čime im se prijeti, učinit će im se da su ostali samo jedan čas dana. I dosta! A zar će ko drugi biti uništen do narod raskalašeni!” (El-Ahkaf, 35)

“A na Dan kad nastupi Čas oživljenja, zločinci će se zaklinjati da su u grobovima samo jedan čas ostali; a i prije su istinu izbjegavali.” (Er-Rum, 55) Šta je onda tvoj život u odnosu na ovaj čas, za koji nas je Allah, džellešanuhu, obavijestio da traje koliko traje ovaj svijet do nastupanja Sudnjeg dana?! Ovaj čas, koji je jednak trajanju čitavog dunjaluka, poput je kapljice u okeanu svevremenosti i vječnosti. Blago onome ko u svom kratkom životu bude činio dobra djela, izbjegavao zabranjene stvari – harame i čuvao se slijeđenja strasti, krivih puteva i zabluda, i tako postigne dobrote onog svijeta i stekne Allahovo zadovoljstvo, nakon smrti, u džennetima uživanja, a teško onome ko bude slijedio svoje prohtjeve, zapostavio namaze i druge vjerske obaveze i činio velike grijeha, i strovali se u Džehennem, u kojem će njegova hrana biti Zekum, a piće gnoj i užarena tekućina. O ti kojeg je obmanulo zdravlje, pa si se odao grijesima! O ti kojeg je pokvarila besposlenost, pa si se odao zabavi! O ti kojeg je zaveo imetak, pa si se uzoholio! O ti koji slijediš svoje strasti, pa si se na niske grane spustio! O ti kojeg je obmanula mladost, pa si zaboravio prolaznost života! O ti koji Allahove blagodati koristiš kako bi Mu bio nepokoran i prelaziš Njegove granice! Zar





ne znaš da ne postoji stvar koju Allah ne može učiniti na Zemlji i na nebu, i da On žestoko kažnjava? Zar nisi ubijeden u smrt i obračun koji će se nakon nje desiti? O ti kojeg je ohrabrio dug život i ostvarenje nekih želja, pa si se usprotivio svome Gospodaru, i u takvom si stanju dočekaš smrt, imaš li sada načina da se vratiš na dunjaluk i popraviš svoja djela? O ti koji si nemaran, i koji si se okrenuo od Božijih naredbi i odao grijesima, zar nije došlo vrijeme da se pokaješ i predaš svome Gospodaru? Zar nije došlo vrijeme da se probudiš iz ovog nemara i odazoveš pozivu svoga Gospodara? Zar nisi uzeo pouku od prošlih jakih naroda i njihovih praznih domova, koji su nestali sa lica Zemlje, nakon što su na njoj posijali drveće, proveli rijeke, podigli gradove, kako su poslije bivstvovanja postali samo trag, i poslije uspona samo vijest, i kako su iz dvoraca preneseni u kaburove i postali zavisni jedino od svojih djela? Oni koji su činili dobra djela, istinski su pobjednici, a oni koji su činili loša djela, istinski su gubitnici. Može li se neko odbraniti od smrti? Postoji li uputa mimo Kur’ana? Zaista je u dolasku i odlasku dana i godine pouka. Tvoj život je dan koji je prošao i nikad se više neće vratiti, i dan koji iščekuješ, i tako sve do roka određenog, kada će se prekinuti sve nade.

Uzvišeni kaže: “... i da je čovjekovo samo ono što sam uradi, i da će se trud njegov, sigurno, iskazati, i da će prema njemu u potpunosti nagrađen ili kažnjen biti, i da će se Gospodaru tvome ponovo vratiti.” (En-Nedžm, 39–42)

Radi za Kuću vječnosti čiji užici ne prolaze i ne smanjuju se, naprotiv povećavaju se, u kojoj mladost ne prijeti starost, čiji stanovnici ne strahuju od bolesti i ne pribojavaju se smrti.

Uzvišeni kaže: “Uđite u nj, u miru, ovo je Dan vječni! U njemu će imati što god zažele – a od Nas i više.” (Kaf, 34–35)

“... uđite u Džennet, vi i žene vaše, radosni! Oni će biti služeni iz posuda i čaša od zlata, u njemu će biti sve što duše zažele i čime se oči naslađuju, i u njemu ćete vječno boraviti. ‘Eto, to je Džennet koji vam je darovan kao nagrada za ono što ste radili, u njemu ćete svakovrsnog voća imati od kojeg ćete neko jesti.’” (Ez-Zuhruf, 70–73)





Izvršavanjem Božijih naredbi i izbjegavanjem onoga što izaziva Njegovu srdžbu čuvajte se Vatre čija kazna ne prestaje.

Uzvišeni kaže: "... onima koji ne budu vjerovali bit će odijela od vatre skrojena, a ključala voda bit će na glave njihove ljevana; od nje će se istopiti ono što je u trbusima njihovim, i koža, a gvozdanim maljevima bit će mlaćeni; kad god pokušaju zbog teškog jada iz nje izaći, bit će u nju vraćeni: 'Iskusite patnju u užasnoj vatri!'" (El-Hadždž, 19–22)

Radite, o vjernici, za Džennet predivni, čuvajte se grijeha zbog kojih će oni koji ih čine biti bačeni u vatrenu provaliju i znajte da je između čovjeka i Dženneta ili Vatre samo smrt. Ebu Hurejra, radijallahu anhu, prenosi da je Vjerovjesnik, sallallahu alejhi ve sellem, rekao: "Požurite s činjenjem dobra prije nego što se desi sedam stvari: šta iščekujete osim siromaštva zbog kojeg ćete sve zaboraviti, ili bogatstva koje će vas objesnim učiniti, ili bolesti koja će vas oslabiti, ili starosti u kojoj nećete znati šta govorite, ili sigurnu smrt, ili Dedžala, a zao je onaj koga iščekujete, ili Smak svijeta, a Smak svijeta je užasniji i gorči." (Tirmizi) U hadisu se kaže: "Često se sjećajte onoga što će prekinuti sve užitke, smrti, jer niko se neće sjetiti smrti u obilju a da to neće umanjeti njegovo obilje, ili u oskudici a da neće uvećati njegovo dobro." Poslanik, sallallahu alejhi ve sellem, kaže: "Smrt je dovoljna kao opomena." Ispuni svoje dane s koliko god možeš dobrih djela, i čuvaj stranice svoje knjige od loših djela.

Uzvišeni kaže: "... a pripremite što i za duše svoje. I bojte se Allaha i znajte da ćete pred Njega stati. A ti obraduj prave vjernike!" (El-Bekara, 223)

"I molitvu obavljate i zekat dajete, a za dobro koje za sebe pripremite naći ćete nagradu kod Allaha, jer Allah dobro vidi ono što radite." (El-Bekara, 110)

O vjernici, Allah vam je otvorio vrata Svoje milosti: propisao vam je činjenje dobra i ostavljanje grijeha, i neka niko sebi ne zatvori vrata milosti suprotstavljajući se Allahu činjenjem grijeha.

Uzvišeni kaže: "... a milost Moja obuhvata sve; dat ću je onima koji se budu grijeha klonili i zekat davali, i onima koji u dokaze Naše budu vjerovali." (El-A'raf, 156)





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA." (PREPOROD)

HUTBE 

Iskoristi, čovječe, vrijeme blagostanja. Ibn Abbas prenosi da je Allahov Poslanik, sallallahu alejhi ve sellem, rekao: "Većina ljudi je nemarna prema dvjema blagodatima: zdravlju i slobodnom vremenu." (Buhari) Ibn Omer, radijallahu anhumu, prenosi da je Poslanik, sallallahu alejhi ve sellem, rekao: "Budi na dunjaluku kao da si stranac ili putnik." (Buhari i Muslim)

O muslimani! Uzvišeni Allah kaže: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Molim Allaha da i meni i vama podari blagoslov u časnom Kur'anu i da podari da nam koriste njegovi ajeti i mudra opomena. Rekoh ovo i od Allaha tražim oprost za sebe, vas i sve muslimane od svakog grijeha, a tražite i vi, On mnogo prašta i On je milostiv.

